

vi pregamo che non manciate de quella solitudine siamo certi siate per fare, justa el solito vostro; et Dio excelentissimo ve guardi.

*Copia del salvoconducto de Culgibech fiol de Chali signor de Tripoli, turco, mandato a li nostri mercadanti, che habino a tornar a Tripoli.*

49 El nostro comandamento è da alto, che exaltado sia Dio. Scrivemo questo nostro comandamento sinceramente per i mercadanti franchi che erano in Tripoli, custoditi da Dio, usciti et andati in Cypri, che Dio li conserva ne la loro concordia, perchè essendo nui per el nostro cavalcare arduo ritornati presto et reduti in Tripoli, custodida da Dio, havendo inteso come sono scampati per el periculo de le loro persone, li havemo per excusati in questo, et però li mandemo el presente comandamento che se debano presentar sopra di esso, et debino ritornare a le loro stantie, portando *cum* sè le mercantie, li veludi, pani, razi et ogni altra roba, che saranno da nui liberi, non ofesi, ma defesi, sichè niun li potrà nocere, nè dar fastidio in dicto, nè in fato; et cussì sopra di loro sia questo libero et sicuro salvoconduto che 'l Signor Dio excelentissimo et el suo nuntio lo confermi; sichè habino di stare di bon animo, et *cum* bon core, purchè siano prestì a tornare *cum* le loro mercantie prestì et prestì. Et perchè havemo inteso che avanti el nostro ritornar a Tripoli, custodida da Dio, li son stà tolto da le loro case alcune robe, quando saranno azonti de qui, li prometemo far restituir el tutto; et però le havemo tolte in guardia sotto la bulla nostra.

*Copia di una letera de Abulfadel Machemet, fiol de Hedris cadè de Tripoli, scripta da Tripoli a dì 7 Fevver, directiva al rezimento de Cypro.*

Le presente scripte a l'excelentissimo honoratissimo miglior de li baptezati et più docto de la fede cristiana, incoronato de la corona de Christo Signor, al qual obedisse Cypro, che sempre i soi loci siano laudati et del suo governo da nui comandato. Ve avisemo a vui gubernator de Cypro come cognoscendo che voi seti savio veramente, sichè 'l non bisogna che vi dicemo altro da parte di nostri mazori intendendo che i scrivani Sech-el-Barchet, Sech Suliman, Siech Chana et sui compagni, et li mercadanti grandi de Tripoli, et Alovise de Adamo, An-

gelo, Pietro et Francesco, et quelli che hanno in loro compagnia che sono fugiti quando se partissemo da Tripoli, hora che semo ritornati qui a Tripoli et venuti *cum* tanto exercito, che da quello è impita la terra per tutto el circuito di Damasco da ogni parte, et che havemo conseguito per la gratia di Dio el nostro intento et assicurati tutti li paesani di fuori sichè el se stà di bona voglia, desideremo et volemo che debano tornare *cum* tutti li forestieri al suo loco; et si ve pregemo che fazati chiamar li antedieti mercadanti et persone avanti di voi et fatele bon animo, mandandoli al suo loco, che saranno ben acarezati per ogni modo. Et per quello vedemo vui esser prompto, non bisogna altramente sollicitare.

*1520, a dì 10 Fevver, hora XXII diei.*

Zuane de Zupana patron de gripeto, reporta che Zobia da sera proximo preterito partì da Soldin, donde riporta come hozi sono 22 zorni, che ritrovandosi in dicto loco vete passare el campo del Signor turco *cum* persone 40 milia, per suo giudicio, et per quanto li è stà afirmato che 'l sia ancora in mazor summa; diece zorni et diece nocte continuamente non hanno refinato di passare; et che hanno conducto *cum* loro boche 60 de artelarie de bronzo tute guidate da' giudei, de grandezza che octo cavali tiravano cadauna assai comodamente. El bassà de la Trapezonta era capitano del campo, et era beletissima zente a cavallo tutti, tra quali erano assaissimi schiopetieri.

*Die dicta.*

Francesco di Zuan Grandi mercadante venetian azonto in questo zorno et hora qui a Famagosta, reporta che Marti 5 de l'istante, di matina, ritrovandosi in Damasco, el vene nova come Bene Cureuma era azonto *cum* diece mille persone de' turchi et paesani lontan de Damasco 40 miglia; per il che el signor Gazeli uscite fuori *cum* 40 milia persone tra cavali et pedoni, tra el Dari et Charri, dove atrovò el dito Bene Cureumas. Subito avuta vista di lui, el campo di esso signor se comenzò risolvere chi ad una via et chi a l'altra, *adeo* che in Damasco a hora di vespero vene la nova; *unde* esso sier Francesco subito montò a cavallo *cum* missier Domenego da Molin, missier Nicolò da Pexaro et missier Nicolò Contarini et sier Zorzi di Stephani, quali fuzendo verso Baruto trovorno che zà alquanti turchi li volevano tuor la strada; *tamen* se ne fugiteno. Et